

PNB umum agihan pendapatan ASD, ASN Equity 2

KUALA LUMPUR 28 Jun - Permodalan Nasional Berhad (PNB) mengumumkan pengagihan pendapatan bagi dua tabung unit amanah Amanah Saham Nasional Berhad (ASNB) untuk dana harga tetap Amanah Saham Didik (ASD) dan dana harga berubah ASN Equity 2 bagi tahun kewangan berakhir 30 Jun 2018.

Pengerusi Kumpulan PNB, Tan Sri Abdul Wahid Omar berkata, pemegang unit ASD dan ASN Equity 2 masing-masing adalah 6.25 sen seunit dan 3.10 sen seunit.

Menurut beliau, ASD akan membayar sebanyak RM360.7 juta sebagai pengagihan pendapatan kepada lebih 290,000 pemegang unit yang kini memegang 5.845 bilion unit.

"Setakat 31 Mei lalu, ASD merekodkan pendapatan bersih sebanyak RM344.2 juta bagi 11 bulan pertama tahun kewangannya. Pengagihan pendapatan un-

tuk ASN Equity 2 pula melibatkan jumlah pembayaran sebanyak RM46.9 juta kepada lebih 29,000 pemegang unit yang memegang 1.512 bilion unit.

"Ini bersamaan dengan hasil dividen sebanyak 5.40 peratus. Setakat 31 Mei 2018, ASN Equity 2 merekodkan pendapatan bersih sebanyak RM45.58 juta untuk 11 bulan pertama tahun kewangannya," katanya dalam kenyataan di sini hari ini.

Tambah Abdul Wahid, PNB masih mampu menghasilkan pulangan yang kompetitif sepanjang tahun bagi kedua-dua dana walaupun berdepan keadaan pasaran yang mencabar yang mana Bursa Malaysia menurun sebanyak 5.53 peratus atau 97.6 mata dalam tempoh setahun yang lalu.

"Kami akan terus memberi



ASN Equity 2

tumpuan kepada kejayaan pelaksanaan Pelan Strategik Strive-15 PNB 2017-2022 untuk terus menjana pulangan yang mampan bagi pemegang unit pada masa akan datang," katanya.

Pengiraan pengagihan pendapatan untuk ASD adalah berdasarkan purata baki minimum yang dipegang sepanjang tahun kewangan tabung tersebut manakala pengiraan untuk ASN Equity 2 adalah berdasarkan unit yang dipegang dan Nilai Aset Bersih setakat 30 Jun 2018.

Pengagihan yang diisytiharkan oleh kedua-dua tabung akan dilaburkan semula sebagai unit tambahan ke dalam akaun pemegang unit dan akan dikreditkan secara automatik ke dalam akaun pemegang unit pada 1 Julai 2018.